

MIMBAR



MAJLIS KESYUKURAN
HARI JADI TUAN YANG TERUTAMA
YANG DI-PERTUA NEGERI SARAWAK



SIDANG REDAKSI

PENAUNG

Yang Berbahagia Tan Sri Datuk Amar Haji Bujang bin Mohd Nor
Setiausaha Kehormat
Lembaga Amanah Kebajikan Masjid Negeri Sarawak

PENASIHAT

Tuan Haji Mohamad Sabry bin Haji Othman
Pengurus Besar
Lembaga Amanah Kebajikan Masjid Negeri Sarawak

EDITOR

Megawati binti Haji Julaihi
Ketua, Sektor Korporat dan Pengurusan

Nona Zaharia binti Fadzil
Ketua, Sektor Kewangan dan Pelaburan

PENGARANG

Abang Bikusary bin Haji Kadir
Ketua, Bahagian Pentadbiran

Abdullah bin Tamel
Ketua, Bahagian Pelajaran

Poniman bin Margiman
Ketua, Bahagian Keselamatan

Noratini binti Sebri
Ketua, Bahagian Pengurusan Sumber Manusia

Haryati binti Mohamad
Ketua, Bahagian Penyelidikan dan Pembangunan

PENOLONG PANEL EDITOR

Rahimah binti Ariffin, Guru MATTARY
Misiah binti Wajhi, Guru MATTARY
Azlyn binti Abdul Rahman, Guru MATTARY
Nurul Ikhsan binti Bohari, Guru MATTARY

KOORDINATOR PENERBITAN DAN REKABENTUK

Mohd Nashriq bin Nizam

PEREKAA GRAFIK & JURUGAMBAR
Heiruzam Filani bin Mohamad
Hadizhami bin Haidi

TERBITAN

Unit Penerbitan

BULETIN MIMBAR EDISI 138 (JUL-SEP 2017)

> KANDUNGAN

- 3 DARI HULU KE MUARA
Masjid Darul Ehsan Kampung Jawa Semengok
- 4 Imarah Masjid Dan Surau
- 5 Majlis Sembahyang Sunat Aidiladha
- 6 Majlis Kesyukuran Harijadi Tuan Yang Terutama Yang di-Pertua Negeri Sarawak
- 8 Majlis Sambutan Maal Hijrah 2017
- 9 Sambutan Rayaku Merdeka
- 10 Sembahyang Hajat Peperiksaan Awam 2017
- 11 Program Dumex Fruits & Vegetables
- 12 Kursus Pra Perkahwinan
- 13 Bengkel Motivasi Dan Teknik Menjawab Soalan Ujian Penilaian Sekolah Rendah
- 14 Berita Bergambar
- 16 Seruan Mimbar
- 18 Bengkel Motivasi Dan Teknik Menjawab Soalan Sijil Pelajaran Malaysia
- 19 Iktibar Dari Peristiwa Hijrah Rasullullah S.A.W.
- 20 Fadhilat Dan Kelebihan Ibadah Korban
- 21 Rentetan Pembinaan Masjid Bandaraya Kuching
- 22 Pengurusan Kewangan
- 23 Profil Warga LAKMNS

WACANA PENGARANG

Allahuakbar, Allahuakbar, Allahuakbar
Allahuakbar, Allahuakbar, Allahuakbar
Allahuakbar, Allahuakbar, Allahuakbar...Walillahilham

Assalamualaikum Warahmatullahi Wabarakatuh buat pembaca budiman yang dirahmati Allah S.W.T. sekalian.

Segala puji bagi Allah S.W.T. yang menciptakan langit dan bumi. Kita telah pun menyambut pelbagai perayaan dan juga kejayaan seperti Hari Kemerdekaan Sarawak, Sambutan Kemerdekaan yang berselang sehari dengan Sambutan Aidiladha dan Hari Malaysia.

Bercerita mengenai kemerdekaan dalam konteks Islam, ia membawa maksud pembebasan atau memerdekaan sesebuah negara serta masyarakat itu dari perhambaan kepada tuhan yang salah kepada perhambaan kepada tuhan yang sebenar-benarnya, yang tiada sekutu, esa dan maha berkuasa iaitu Allah Azza Wajalla.

Jika dilihat dari sudut individu, erti kemerdekaan termasuklah seseorang itu bebas daripada godaan syaitan dan beltitan hawa nafsu yang sering mendekati kehidupan manusia. Sebagaimana ashabul ukhud yang matinya dalam keadaan merdeka kerana pada waktu itu, hanya dia yang beriman kepada Allah S.W.T. dan setelah matinya dia, seluruh rakyat juga turut mati demi keriman beriman kepada Allah S.W.T.

Sidang pembaca yang dikasih sekalian, Marilah kita mengambil iktibar pengorbanan daripada peristiwa nabi Allah S.W.T. iaitu Nabi Ibrahim A.S. yang diperintahkan untuk menyembelih anak kesayangannya, Nabi Ismail A.S. Demi ketataan dan keimanan kepada Allah S.W.T., Baginda A.S. tetap melaksanakan perintah Allah S.W.T.

Pengarang mengajak para pembaca sekalian untuk sama-sama mengambil iktibar daripada kisah Nabi Ibrahim A.S. dan Nabi Ismail A.S. Sebagai rakyat yang harmoni dan berbilang kaum, kita haruslah bersama-sama berganding bahu memperbaiki diri kita mengikut acuan al-Quran dan As-Sunnah bagi menjadi perisai bukan sahaja kepada diri kita dan keluarga, malah juga kepada negara yang kita cintai ini.

UNIT PENYELARAS KEGIATAN

DARI HULU KE MUARA



MASJID DARUL EHSAN KAMPUNG JAWA SEMENGGOK



3
Sejarah awal Masjid Darul Ehsan ini bermula daripada pembinaan surau sekitar tahun 1950an. Setelah itu, ia mendapat namanya menjadi Masjid Darul Ehsan Kampung Jawa Semengok setelah dibaikpulih semula pada tahun 1960an semasa era pemerintahan mantan Tuan Yang Terutama Yang di-Pertua Negeri Sarawak, Tun Abdul Rahman Ya'kub selaku Ketua Menteri Sarawak pada ketika itu.

Asalnya masjid ini dibina melalui sumbangan Kerajaan Negeri Sarawak berjumlah RM8,000.00. Dengan bantuan dan kerjasama penduduk kampung, bangunan ini berubah dan dapat menampung 40 hingga 50 jemaah ketika itu.

Selang beberapa tahun, jawatankuasa masjid serta penduduk kampung pada masa itu telah mendapat berita baik tentang kelulusan pembinaan masjid baharu di tapak baharu milik penduduk kampung dan tidak jauh dari masjid asal pada tahun 2009. Setelah diluluskan, maka projek pembinaan masjid baru ini telah dilaksanakan pada tahun tersebut oleh Syarikat Bella Sempurna Sdn. Bhd. lantikan daripada Baitulmal Sarawak dan siap sepenuhnya pada 5 November 2010.

Masjid ini terus mengalami transformasi dengan adanya Jawatankuasa Masjid Darul Ehsan yang dilantik bagi mengurus tadbir masjid dan menunjukkan komitmen yang tinggi dalam usaha mengimarahkan masjid dengan program-program keagamaan.

PROGRAM LAWATAN SILATURAHIM, PENYEBARAN MAKLUMAT DAN PENGIMARAHAN MASJID/SURAU

Unit Penyelaras Kegiatan, Bahagian Masjid – Masjid, Lembaga Amanah Kebajikan Masjid Negeri Sarawak (LAKMNS) telah mengadakan Program Lawatan Silaturahim, Penyebaran Maklumat Dan Pengimarahuan Masjid/Surau pada kali ini yang bermula pada 14 Julai 2017.

Program lawatan ini diketuai oleh Yang Berbahagia, Dato Haji Nahrawi bin Haji Abdul Rahman, Pegawai Perhubungan, LAKMNS serta beberapa orang pegawai dan kakitangan Bahagian Masjid - Masjid. Pengisian program bermula selepas sembahyang Maghrib yang dimulai dengan ucapan aluan oleh Pengerusi masjid surau. Sejurus itu, taklimat berkaitan peranan serta fungsi LAKMNS disampaikan oleh Ustaz Khairul Anam Hazmizan bin Hasli, Pegawai Unit Penyelaras Kegiatan. Beliau turut menerangkan tujuan program lawatan ini diadakan adalah untuk meningkatkan jalinan ukhuwah antara umat Islam khususnya di masjid dan surau di seluruh Negeri Sarawak.

4

Aturcara diteruskan dengan tazkirah agama oleh Yang Berbahagia Dato Haji Nahrawi bin Haji Abdul Rahman. Antara intipati tazkirah yang disampaikan ialah kesatuan dan semangat perpaduan dalam kalangan masyarakat Islam perlu dijaga demi kemajuan serta keharmonian masjid dan kampung. Majlis diakhiri dengan sembahyang Isyak berjemaah.

Sambutan yang diberikan oleh masyarakat Islam terhadap program yang diadakan ini amat memberangsangkan. Beberapa siri lawatan sepanjang bulan Julai hingga September 2017 seperti berikut:

1. Surau Darul Falah,Kampung Pendam Ulu,Sadong Jaya
2. Surau Hidayatul Salihin,Kampung Terasi Ulu,Asajaya
3. Surau Jama' Ar-Rahman,Agenzia Anti Dadah Kebangsaan,Kuching
4. Surau Darul Syahadah,Kampung Sebat Baru,Sematan
5. Masjid Darul Salam,Kampung Tanjung Kelaso,Sadong Jaya
6. Masjid Darul Ehsan,Kampung Jawa Semenggok
7. Surau Darul Hidayah,Desa Bina Diri,Jalan Batu 7,Kuching
8. Surau Darul Hidayah,Kampung Siru Melayu,Sematan
9. Masjid Darul Ikhsan,Kampung Tanjung Tuang,Samarahan

Semoga program lawatan yang diadakan ini menitipkan impak yang positif dan mendapat keberkatan dari Allah S.W.T.



Ustaz Khairul Anam Hazmizan bin Hasli menyampaikan taklimat di Surau Jama' Ar-Rahman, Agensi Anti Dadah Kebangsaan, Kuching



Para jemaah sedang tekun mendengar ceramah yang disampaikan



MAJLIS SEMBAHYANG SUNAT

Aidiladha

Sembahyang Sunat Hari Raya Aidiladha 1438H telah diadakan di Masjid Jamek Negeri Sarawak pada 1 September 2017 bersamaan dengan 10 Zulhijjah 1438H.

Hari Raya Aidiladha juga dikenali sebagai Hari Raya Korban atau Hari Raya Haji yang diraikan oleh seluruh umat Islam di setiap pelusuk dunia. Ia merupakan antara hari perayaan Islam yang terbesar disambut umat Islam selain Aidilfitri. Sambutan ini diraikan pada hari yang ke-10,11,12 dan 13 pada bulan Zulhijjah.



Ketua Menteri Sarawak, Yang Amat Berhormat Datuk Patinggi (Dr.) Abang Haji Abdul Rahman Zohari Bin Tun Datuk Abang Haji Openg bersalam dengan para jemaah selepas menunaikan sembahyang sunat Hari Raya Aidiladha

Info

Program sembahyang Sunat Hari Raya Aidiladha bermula dengan Takbir Aidiladha pada pagi 10 Zulhijjah, diikuti dengan Sembahyang Sunat Aidiladha serta Khutbah Aidiladha yang disampaikan oleh Sahibul Fadhilah Al-Fadhl Ustaz Haji Mustapha Kamal bin Haji Ahmad Fauzi, Imam Besar Negeri Sarawak.

Dianggarkan 5000 orang jemaah dari sekitar Bandaraya Kuching yang datang untuk sama-sama menunaikan sembahyang Sunat Hari Raya Aidiladha.

Solat Sunat Hari Raya Aidiladha dua rakaat adalah sunat muakkad, yang dilakukan pada waktu pagi 10 Zulhijjah. Ia merupakan penghormatan dan kesyukuran kepada umat Islam yang sedang mengerjakan ibadah Haji di Tanah Suci Makkah. Solat Sunat Aidil Adha (Hari Raya Korban) digalakkan diawalkan waktunya bagi memberi lebih banyak masa untuk penyembelihan haiwan korban.

MAJLIS KESYUKURAN SEMPENA HARI JADI TUAN YANG TERUTAMA YANG DI-PERTUA NEGERI SARAWAK

Pada 08 September 2017 telah berlangsungnya Majlis Kesyukuran Bersempena Hari Jadi TYT Yang di-Pertua Negeri Sarawak di Masjid Jamek Negeri Sarawak. Majlis ini telah berlangsung dengan meriahnya sempena meraikan Hari Jadi Tuan Yang Terutama Yang di-Pertua Negeri Sarawak Tun Pehin Sri Haji Abdul Taib Mahmud yang ke-81 tahun.



Ketibaan Tuan Yang Terutama Yang di-Pertua Negeri Sarawak Tun Pehin Sri Haji Abdul Taib Mahmud disambut oleh Yang Amat Berhormat Datuk Patinggi (Dr.) Abang Haji Abdul Rahman Zohari bin Tun Datuk Abang Haji Openg

Majlis telah dimulakan dengan sembahyang Maghrib berjemaah dan sejurus selepas itu pula diadakan bacaan Surah Yasin dan Doa Kesyukuran yang dipimpin oleh Sahibul Fadhilah Al-Fadhl Ustaz Mustapha Kamal bin Ahmad Fauzi, Imam Besar Negeri Sarawak. Seterusnya, majlis diserikan lagi dengan alunan Zikir Marhaban oleh 55 buah kumpulan zikir yang terdiri daripada 55 buah masjid/surau sekitar Kuching.



Tuan Yang Terutama Yang di-Pertua Negeri Sarawak Tun Pehin Sri Haji Abdul Taib Mahmud diiringi pembesar-pembesar negeri Sarawak.

**“ALLAH LINDUNGI DAN
PELIHARA PEMIMPIN
YANG KAMI KASIHI DAN
SANJUNGI.”**



Tetamu kehormat serta para jemaah mengaminkan doa kesyukuran yang dipimpin oleh Sahibul Fadhilah Al-Fadhl Ustaz Mustapha Kamal bin Ahmad Fauzi, Imam Besar Negeri Sarawak.



Tuan Yang Terutama Yang di-Pertua Negeri Sarawak Tun Pehin Sri Haji Abdul Taib Mahmud bersalam dengan para jemaah yang hadir.



MAJLIS SAMBUTAN MAAL HIJRAH

“Kesatuan Ummah Kesejahteraan Negara.”



Maal hijrah yang diadakan sempena tibanya 1 Muharam adalah perayaan yang disambut setiap tahun sempena mengingati dan mengambil pengajaran daripada peristiwa hijrah Rasulullah S.A.W. dan para sahabat baginda. Pada tahun 2017 ini, tema untuk Maal Hijrah 1439H ialah Kesatuan Ummah Kesejahteraan Negara.

Bagi menghayati peristiwa tersebut, Lembaga Amanah Kebajikan Masjid Negeri Sarawak (LAKMNS) turut mengadakan pengisian pada 21 September 2017 bersamaan 01 Muharam 1439H yang dimulakan dengan bacaan doa akhir tahun, sembahyang Maghrib berjemaah, bacaan doa awal tahun yang dipimpin oleh Al Fadhl Ustaz Haji Mohd Ihsan bin Haji Haidzir, Penolong Imam Besar Negeri Sarawak. Seterusnya diikuti ceramah agama dan sembahyang Isyak berjemaah.

Objektif program ini diadakan adalah untuk memperingati peristiwa bersejarah tersebut disamping untuk mengingati dan mengambil ibrah daripada peristiwa tersebut melalui ceramah agama yang disampaikan oleh Al-Fadhl Ustaz Dr. Saimi bin Bujang di Masjid Jamek Negeri Sarawak dan Al-Fadhl Ustaz Haji Jahidin bin Abdul Latiff di Masjid Bandaraya Kuching.

Dianggarkan seramai 500 orang Jemaah telah hadir dalam program tersebut dan program ini juga merupakan salah satu usaha dakwah dalam meningkatkan keimanan dan ketakwaan kepada Allah S.W.T.

Seterusnya pada 30 September 2017, diadakan juga Program Kuliah Dhuha sempena Sambutan Maal Hijrah 1439H yang diadakan di Auditorium Pustaka Negeri Sarawak. Penceramah jemputan bagi program ini ialah Al-Fadhl Ustaz Mual bin Haji Suaud, Penolong, Ketua Mufti Negeri Sarawak, Jabatan Mufti Negeri Sarawak dengan tajuk ceramahnya “Hijrah Hati, Cinta Allah S.W.T.”. Dianggarkan seramai 200 orang Jemaah yang hadir dalam program tersebut.



Al-Fadhl Ustaz Dr. Saimi bin Bujang



Al-Fadhl Ustaz Haji Jahidin bin Abdul Latiff



Bacaan Doa Akhir Tahun yang dipimpin oleh Al-Fadhl Ustaz Haji Mohd Ihsan bin Haji Haidzir, Penolong Imam Besar Negeri Sarawak

SAMBUTAN RAYAKU MERDEKA PERINGKAT SEKOLAH

Tariikh 21 Julai 2017 bersamaan dengan 27 Syawal 1438H telah dipilih sebagai Hari Sambutan RAYAKU MERDEKA MATTARY peringkat sekolah bagi menyambut dan meraikan kemeriahan bulan Syawal, bulan kemerdekaan dan Hari Sarawak.

Matlamat utama Sambutan RAYAKU MERDEKA MATTARY peringkat sekolah 2017 adalah untuk meraikan bulan Syawal sebagai tanda kemenangan anak-anak yang telah berjaya menjalankan ibadah puasa di bulan Ramadan serta menghargai pengorbanan dan perjuangan datuk nenek kita yang berusaha mencapai kemerdekaan tanah air.



Acara kemuncak sambutan pada kali ini ialah perasmian Arkib Sejarah yang disediakan oleh Panitia Sejarah pimpinan Cikgu Nurul Ikhsan binti Bohari. Pameran Arkib Sejarah ini amat bermanfaat di mana ia dapat menambahkan ilmu pengetahuan anak-anak MATTARY.



Antara tetamu jemputan yang hadir pada Majlis Sambutan Rayaku Merdeka ialah Encik Abdullah bin Tamel, Ketua Bahagian Pelajaran, Puan Haryati binti Mohamad, Ketua Bahagian Penyelidikan dan Pembangunan serta pegawai-pegawai Bahagian Pelajaran. Semua tetamu telah dijamu dengan pelbagai hidangan semasa lawatan ziarah mereka ke Kelas Terbuka MATTARY. Suasana meriah tambah berseri dengan pakaian murid yang berwarna warni.



Pada hari berkenaan juga turut dilancarkan Program Perjuangan Kemerdekaan yang bermula pada 22 Julai sehingga Hari Malaysia iaitu pada 16 September 2017. Antara aktiviti dan pertandingan yang dijalankan sepanjang program ini adalah Pertandingan Kelas Merdeka, Persembahan Nyanyian Lagu Patriotik Antara Kelas dan Kibaran Jalur Gemilang.

Semoga semua program yang telah dijayakan ini memberi manfaat kepada semua terutamanya anak-anak MATTARY. Besarlah harapan agar program ini dapat diteruskan lagi pada tahun akan datang.

“KU PANJATKAN DOA HIDUP BERJAYA DALAM BERKAT DAN RAHMAT”



Sembahyang hajat dipimpin oleh Al-Fadhil Ustaz Mohd Safwan bin Mahli

Alhamdulillah bersyukur kita ke hadrat Allah S.W.T. kerana dengan berkat rahmat dan izin-Nya maka Majlis Sembahyang Hajat Sempena Peperiksaan Awam 2017 berjaya dilaksanakan.

Program anjuran Lembaga Amanah Kebajikan Masjid Negeri Sarawak (LAKMNS) ini diadakan pada 24 Ogos 2017M bersamaan dengan 2 Zulhijjah 1438H bertujuan untuk memohon kepada Allah S.W.T. agar urusan anak-anak yang akan menduduki peperiksaan awam seperti Ujian Pencapaian Sekolah Rendah (UPSR), Penilaian Tingkatan 3 (PT3) dan Sijil Pelajaran Malaysia (SPM) diper mudahkan.

Selain itu, majlis ini berobjektifkan penerapan nilai Islam dalam menghadapi ujian seperti amalan melakukan sembahyang hajat, berdoa dan zikir. Program tersebut berjaya mengumpulkan seramai lebih daripada 2000 orang terdiri daripada murid, pelajar dan ibu bapa dari sekitar Bandaraya Kuching.

Majlis Sembahyang Hajat Peperiksaan Awam 2017 dimulakan dengan sembahyang Maghrib berjemaah yang dipimpin oleh Al-Fadhil Ustaz Mohd Safwan bin Mahli. Selepas sembahyang Maghrib, jemaah bersama-sama membaca Surah Yasin dan disusuli dengan selawat serta zikir. Aturcara kemuncak iaitu sembahyang Hajat diadakan selepas sembahyang Isyak.



Ibu bapa serta anak-anak yang bakal menduduki peperiksaan awam sedang mengaminkan doa dan membaca Surah Yasin.



PROGRAM BERSAMA ANJURAN PIHAK “DUMEX DUGRO FRUITS & VEGETABLES” 2017

Pada 13 dan 14 September 2017 (Rabu dan Khamis), pihak Dumex Dugro Fruits & Vegetables telah berkunjung ke Tadika Tahfiz Tun Abdul-Rahman Ya’kub (TATTARY) bagi mengadakan program yang melibatkan murid-murid 4 dan 5 tahun. Antara tujuan program ini diadakan adalah untuk memperkenalkan kebaikan minuman susu Dugro F&V.

Program selama dua hari tersebut dimulakan dengan sesi pengenalan kepada murid-murid oleh wakil Dumex Dugro berkenaan produk Dugro F&V yang mengandungi 13 jenis buah dan sayuran dalam tempoh masa lima minit dengan pelbagai bahan dan ilustrasi yang menarik bagi mendapat perhatian murid-murid. Seterusnya turut diadakan permainan yang melibatkan semua murid selama 20 minit.

Bagi memeriahkan program tersebut juga, maskot untuk Dumex Dugro turut didatangkan khas iaitu “Apple”. Anak-anak TATTARY amat teruja melihat kehadiran maskot “Apple” pada program tersebut. Sebelum majlis berakhir, sesi menyanyi beramai-ramai lagu tema Dumex Dugro Fruits and Vegetables dan lagu Alam Dugro turut diadakan.

Sebagai tanda penghargaan, pihak Dumex Dugro telah mengedarkan “goodies bag” yang mengandungi sepeket susu Dugro F&V 600g dan buku aktiviti mewarna F&V kepada setiap murid 4 dan 5 tahun TATTARY.

Kesemua murid 4 dan 5 tahun TATTARY, seronok mengikuti program tersebut dan berharap pada masa akan datang akan ada lagi program seperti ini.



AKHLAK YANG MULIA MENJAMIN KEHARMONIAN DALAM KELUARGA

Sabda Rasulullah S.A.W.:

“Sesungguhnya lelaki mukmin yang sempurna imannya ialah mereka yang baik tingkah lakunya dan lemah lembut terhadap isteri dan anak-anaknya”,
(Riwayat al-Tirmizi)

Hadis tersebut menggalakkan seorang suami menunjukkan akhlak yang mulia atau mahmudah dalam memimpin sebuah institusi perkahwinan. Penekanan akhlak mahmudah telah dibentangkan dalam salah satu slot Kursus Pra Perkahwinan anjuran Bahagian Penyelidikan dan Pembangunan, Lembaga Amanah Kebajikan Masjid Negeri Sarawak (LAKMNS).

Selain suami, isteri juga perlu memiliki akhlak mahmudah seperti berikut:

- bertakwa
- mentaati suami
- menghiasi diri untuk suami
- mencintai dan mengasihi suami
- menjaga kehormatan diri dan harta suami
- menjaga rahsia rumah tangga
- melaksanakan kepimpinan selaku isteri dan
- memohon keizinan suami

Kursus Pra Perkahwinan ini telah dihadiri oleh 138 orang peserta berdasarkan tarikh seperti berikut:

BIL

TARIKH

1. 12 hingga 13 Ogos 2017
2. 9 hingga 10 September 2017

BILANGAN PENYERTAAN

- | |
|----------|
| 80 orang |
| 58 orang |



BENGKEL MOTIVASI DAN TEKNIK MENJAWAB SOALAN UJIAN PENILAIAN SEKOLAH RENDAH

UPSR

Pada 29 hingga 30 Julai 2017, Bahagian Penyelidikan dan Pembangunan, Lembaga Amanah Kebajikan Masjid Negeri Sarawak (LAKMNS) dengan kerjasama Bahagian Pelajaran telah menganjurkan Bengkel Motivasi dan Teknik Menjawab Soalan Ujian Penilaian Sekolah Rendah (UPSR) di Bilik Kuliah, Pusat Pengajian al-Quran Tun Abdul-Rahman Ya'kub (PATARY).

Bengkel ini telah dihadiri oleh 66 orang murid yang merangkumi murid-murid Ma'had Tahfiz Tun Abdul-Rahman Ya'kub (MATTARY) dan Pusat Kecemerlangan MASJA-SA, LAKMNS.

Penceramah-penceramah bengkel tersebut adalah terdiri daripada Pegawai Psikologi, Lembaga Penduduk dan Pembangunan Keluarga Negara (LPPKN), Jurulatih Utama dan guru-guru berpengalaman seperti berikut:

BIL	NAMA PENCERAMAH	PERKARA
1	CIK NADIA AMIZA BINTI SUHAILI	SLOT MOTIVASI
2	CIKGU MOHAMMAD BIN JOL	BAHASA MELAYU
3	CIKGU HAJAH MASNU BINTI HAJI SULAIMAN	BAHASA INGGERIS
4	CIKGU MUHAMAD BIN ABD AZIZ	MATEMATIK
5	CIKGU HAJIBAH BINTI SEPAWI	SAINS

Di antara tip-tip penting sebelum menjawab soalan UPSR yang telah dikongsi dalam bengkel tersebut adalah seperti berikut:

1	DENGAR DENGAN TELITI ARAHAN PENGAWAS PEPERIKSAAN
2	BACA ARAHAN PADA KERTAS SOALAN DENGAN TELITI
3	BACA, TELITI DAN FAHAMI KEHENDAK SOALAN (BACA SEKURANG-KURANGNYA 2 KALI)
4	TETAPKAN MASA MENJAWAB SETIAP SOALAN IKUT PERIUNTUKAN MASA
5	JAWAB SOALAN MUDAH DAHULU (SOALAN SUSAH BULATKAN DAN JAWAB KEMUDIAN)
6	TULISAN MESTI KEMAS
7	SELEPAS HABIS MENJAWAB SOALAN, SEMAK SEMULA JAWAPAN DARIPADA AWAL (MAKLUMAT DIRI DAN JAWAPAN)
8	DOA DAN TAWAICAL KEPADA ALLAH SWT



Secara keseluruhannya, bengkel ini dapat menyuntik semangat dan memberi tip tentang teknik-teknik menjawab soalan UPSR kepada murid-murid.



SEKITAR MAJLIS RAMAH TAMAH AGENSI-AGENSI ISLAM



MAJLIS KESYUKURAN SEMPENA HARI JADI TUAN YANG TERUTAMA YANG DI-PERTUA NEGERI SARAWAK



MAJLIS SEMBAHYANG SUNAT AIDILADHA

SERUAN **MIMBAR**

SUMBER
<http://www.jais.sarawak.gov.my/>
<http://emasjid.sarawaknet.gov.my/emasjid/khutbah.nsf/khutbahview2?openview&start=21&count=10&>

Kaum muslimin yang dirahmati Allah S.W.T., Marilah sama-sama kita meningkatkan ketakwaan kepada Allah S.W.T. dengan sebenar-benar takwa serta melaksanakan segala perintah-Nya dan menjauhi segala larangan-Nya. Mudah-mudahan kita sentiasa berada di dalam rahmat serta mendapat perlindungan Allah S.W.T. demi mencari keredhaan-Nya di dunia mahu pun di akhirat. Mimbar akan membicarakan khutbah yang bertajuk: “Kesatuan Ummah Kesejahteraan Negara”.

Kaum muslimin yang dirahmati Allah S.W.T., Setiap tahun menjelang sambutan Maal Hijrah, kita sering mendengar seruan agar masyarakat di negara ini hidup bersatu-padu, saling menghormati serta saling membantu antara satu sama lain. Sememangnya, kita tidak dapat manafikan bahawa akar persaudaraan yang kukuh dalam kalangan masyarakat Islam, mampu menjana kejayaan dan kecemerlangan kepada kesejahteraan negara. Oleh yang demikian, persaudaraan atas dasar Islam adalah elemen yang sangat penting dalam menyatukan ummah bagi memastikan keharmonian, kemerdekaan dan kedaulatan negara terus kekal.

Namun, seruan tinggal seruan, peringatan tinggal peringatan kerana umat Islam masa kini masih ada yang berpecah belah, berpuak-puak dan tidak menghormati serta menyayangi antara satu sama lain. Hal ini amat menyedihkan kita bersama. Akibat perpecahan dan perbalahan sesama kita maka kita mudah diperkotak-katikkan oleh orang lain. Kejatuhan kita bukan kerana kekuatan mereka, akan tetapi kerana kelemahan kita sendiri.

Kaum muslimin yang dirahmati Allah S.W.T., Persoalannya, bagaimakah kita dapat mengukuhkan ikatan persaudaraan ini? Bagaimakah dapat kita satukan umat Islam, dan bagaimakah kita dapat mengamalkan apa yang diajar oleh Rasulullah S.A.W.? Dalam hal ini, Islam telah meletakkan dasar-dasar praktis dan cara yang positif dalam usaha memperkuuhkan ikatan kasih sayang dan memperdalamkan roh ukhuwah (persaudaraan) ini.

‘KESATUAN UMMAH KESEJAHTERAAN NEGARA’

Jika umat Islam berpegang teguh dengannya, nescaya persaudaraan itu akan semakin mengukuh, umpama satu binaan yang saling menguatkan antara satu sama lain secara harmoni dan mesra, walaupun dirintangi pelbagai cabaran yang cuba menggagalkan usaha kemajuan serta membangkitkan isu-isu perpecahan di antara masyarakat Islam. Hal ini telah dirakamkan melalui firman Allah S.W.T. dalam Surah al-Hujurat, ayat 10 yang bermaksud:

“Sebenarnya orang yang beriman itu adalah bersaudara, maka damaikanlah di antara dua saudara kamu (yang bertelingkah) itu dan bertakwalah kepada Allah supaya kamu beroleh rahmat”.

Kaum muslimin yang dirahmati Allah S.W.T., Sekalipun semua prinsip dan nilai Islam kekal dan jelas malah dipercayai cukup sempurna, tetapi kita mestilah menyedari bahawa kita tidak boleh mengembalikan kedudukan dan kekuatan untuk membina dan membangunkan tamadun agama, bangsa dan negara seandainya perpecahan dan fitnah masih lagi berlaluosa. Allah S.W.T. telah mengingatkan kita di dalam ayat 46, Surah Al-Anfal yang bermaksud:

“Dan taatlah kamu kepada Allah dan RasulNya, dan janganlah kamu berbantah-bantahan; kalau tidak nescaya kamu menjadi lemah semangat dan hilang kekuatan kamu, dan sabarlah (menghadapi segala kesukaran dengan cekal hati); sesungguhnya Allah berserta orang yang sabar”.

Sesungguhnya, perkara yang paling penting untuk diberi tumpuan ialah mengamalkan manhaj atau pendekatan yang seimbang (wasatiyah) kerana Islam adalah agama yang berasaskan keseimbangan dan toleransi. Maka reformasi tidak boleh dicapai jika ada kebencian, hasad dengki dan permusuhan. Ada pun sifat kasih sayang, akhlak yang baik, bertoleransi dan bersangka baik itu adalah jaminan selepas keimanan kepada Allah S.W.T. dalam melahirkan umat yang baik dan masyarakat yang stabil serta negara yang aman makmur.

Kaum muslimin yang dirahmati Allah S.W.T., Perselisihan yang berlaku antara umat manusia itu merupakan suatu yang lumrah. Namun, uslab (cara) perbincangan yang dilakukan secara hikmah, lembut, bersangka baik dan mesra adalah amat dituntut bagi mendapatkan kata sepakat dan keberkatan. Setiap umat Islam wajib mengetahui bahawa mengukuhkan tali persaudaraan itu adalah jihad yang membawa penyatuan, bukannya perpecahan. Dengan itu, dapatlah kita mengalahkan segala musuh terutamanya musuh yang ada dalam diri kita iaitu nafsu dan godaan syaitan. Selain itu, kita juga hendaklah menjauahkan diri dari jalan-jalan yang boleh membawa kepada taksub (ekstremis), berpecah-belah, tidak berakhlik dan seumpamanya. Ini bertepatan dengan sabda Nabi S.A.W. iaitu:

“Daripada Ibnu ‘Abbas radhiyallahu anhuma bahwa Nabi S.A.W. bersabda pada hari pembukaan Kota Mekah: ‘Tiada lagi hijrah selepas pembukaan Kota Mekah, tetapi (yang tinggal hanyalah) jihad dan niat. Oleh itu, jika kamu diminta keluar berjihad, maka keluarlah!’.

(Hadis riwayat Imam al-Bukhari)

Tuntasnya, hijrah banyak mengajar kita makna perpaduan. Lihat sahaja bagaimana kejayaan Rasulullah S.A.W. dalam menyatukan kabilah Aus dan Khazraj yang sebelumnya saling bermusuhan, atas nama persaudaraan dan demi kasih sayang kepada Allah S.W.T. Oleh itu, Islam melarang keras sebarang bentuk penindasan, kezaliman, kekejaman atau permusuhan dilakukan kerana Islam ialah agama yang membawa rahmat ke seluruh alam.

Kaum muslimin yang dirahmati Allah S.W.T., Jika dilihat dari sudut era globalisasi, hijrah itu merangkumi perubahan dan penghijrahan dari pelbagai aspek iaitu dari sudut fizikal, minda, sikap, hati, selain persekitaran dan sebagainya. Perubahan ini mampu mengubah keadaan hidup sama ada dari segi ekonomi, sosial, pendidikan dan taraf hidup. Kini, negara kita telah mengalami banyak perubahan dan pencapaian dari satu peringkat kepada peringkat yang lain yang lebih baik dan cemerlang. Yang pasti, ia memberikan lebih banyak keberkatan dan kesejahteraan serta dapat pula dimanfaatkan bagi kepentingan hidup di dunia ini dan bekalan di akhirat nanti.

Disedari atau pun tidak, umat Islam yang terdiri daripada dua golongan yang saling menguatkan antara satu sama lain ibarat golongan Ansar (penolong) dan Muhajirin (yang dibantu), tumbuh menjadi sebuah masyarakat Islam yang dinamakan ummah Islamiah yang semakin kukuh dan mampu mempertahankan diri sekiranya mereka dapat menamatkan sebarang permusuhan melalui agenda persaudaraan atas semangat Ukhuwah Islamiah.

Oleh itu, mimbar menyeru sidang jemaah sekalian, marilah kita berusaha untuk menghayati ajaran Islam dengan sepenuhnya agar kesatuan kita semakin rapat dan kuat sehingga musuh tidak lagi berani memperkotak-katikkan kita sesuka hati. Hijrah berjaya menukar insan yang tertindas kepada yang bebas, insan yang dihina kepada yang mulia, dan insan yang lemah bertukar menjadi kuat.

Kaum muslimin yang dirahmati Allah S.W.T., Sempena dengan sambutan Maal Hijrah Peringkat Negeri Tahun 1439H, mimbar ingin mengajak para jemaah sekalian, marilah kita terus memperkasakan tali persaudaraan sesama kita mendokongi usaha kerajaan dalam mengekalkan perpaduan, hidup rukun dan harmoni serta penuh mahabbah (kasih sayang) yang menjadi transformasi kepada kemakmuran negara sebagai bukti solidariti ummah di negara ini dalam mempromosi keamanan sejagat.

Mimbar juga ingin mengajak para jemaah sekalian untuk menghayati intipati khutbah sebagai pedoman di dalam kehidupan kita, antaranya:

PERTAMA:

Hijrah ialah simbolik tersempurnya semangat persaudaraan Islam (ukhuwah Islamiah) yang ditanam dalam diri umat Islam sehingga dapat menyelesaikan sebarang perbalahan sesama sendiri.

KEDUA:

Hijrah menyuntik semangat hidup bersatu padu dengan membentuk suatu pegangan yang kuat sehingga dapat menyelesaikan segala masalah berpaksikan akidah Islamiah.

KETIGA:

Memperkasakan Islam melalui lapangan jihad ilmu, ekonomi dan pembangunan umat adalah contoh yang sangat praktikal bagi melunaskan semangat hijrah dalam makna yang lebih meluas.

BENGKEL MOTIVASI DAN TEKNIK MENJAWAB SOALAN SIJIL PELAJARAN MALAYSIA (SPM)

SPM merupakan tanda aras yang amat penting kepada tahap prestasi semua pelajar di peringkat menengah sebelum menyambung pembelajaran di peringkat universiti. Selain itu, kecemerlangan dalam SPM menentukan hala tuju kerjaya pilihan pelajar sama ada dalam bidang perubatan, perakaunan, perundangan, pendidikan dan lain-lain.

Justeru itu, Bahagian Penyelidikan dan Pembangunan, Lembaga Amanah Kebajikan Masjid Negeri Sarawak (LAKMNS) dengan kerjasama Bahagian Pelajaran telah mengadakan Bengkel Motivasi dan Menjawab Soalan SPM pada 23 hingga 24 September 2017.

Objektif program ini adalah untuk memastikan para pelajar membuat persiapan akhir dari segi aspek minda, emosi, rohani dan fizikal untuk menghadapi peperiksaan sebenar nanti.

Bengkel tersebut telah disampaikan oleh guru-guru yang berpengalaman dalam menyemak kertas peperiksaan SPM.

Seramai 36 orang pelajar telah menghadiri bengkel tersebut yang merangkumi pelajar-pelajar Pusat Kecemerlangan MASJA-SA dan anak-anak kakitangan LAKMNS.

Secara keseluruhannya, bengkel ini dapat meningkatkan keyakinan diri calon-calon SPM yang akan menduduki peperiksaan SPM bermula pada 6 November 2017.



PENCERAMAH	SUBJEK
CIKGU HAYATI BINTI NARAWI	BAHASA MALAYSIA
CIKGU SITI HAWA JAMILAH BINTI ZAINUDDIN	BAHASA INGGERIS
CIKGU NOOR AZRINAWATI BINTI MARSIT	MATEMATIK
CIKGU SAIFUL BUSFARI BIN SAIE	SAINS



IKTIBAR DARI PERISTIWA HIJRAH RASULULLAH S.A.W KE MADINAH AL MUNAWWARAH

Oleh : Ustaz Abdul Rahman Iqbal bin Aldi

Peristiwa Hijrah Rasulullah S.A.W merupakan salah satu dari rentetan penting dalam perkembangan sejarah awal umat Islam, malah telah dirakamkan oleh Allah S.W.T. dalam al-Quran sebagaimana firman Allah S.W.T. yang bermaksud:

“Sesungguhnya orang-orang yang beriman dan berhijrah serta berjihad dengan harta benda dan jiwa mereka pada jalan Allah S.W.T., dan orang-orang (Ansar) yang memberi tempat kediaman dan pertolongan (kepada orang-orang Islam yang berhijrah itu), mereka semuanya menjadi penyokong dan pembela antara satu dengan yang lain” (Surah Al-Anfal: 72)

Peristiwa Hijrah Nabi S.A.W. berlaku pada tahun ke-14 setelah Nabi Muhammad S.A.W. diangkat menjadi rasul. Sebelum penghijrahan Nabi dan para sahabat ke kota Madinah ini, beberapa siri hijrah yang lain telah berlaku, antaranya hijrah ke Kota Thoif dan hijrah ke Habsyah. Rentetan hijrah Nabi Muhammad S.A.W. ke kota Madinah bermula dengan peristiwa perjanjian ‘Aqobah pertama dimana Nabi Muhammad S.A.W. bertemu dengan 12 orang lelaki dari Yathrib pada musim haji tahun itu, kesemua mereka bersetuju untuk memeluk Islam. Hasilnya, Nabi Muhammad S.A.W. telah mengarahkan Mus’ab bin Umair untuk mengikut 12 orang lelaki tadi ke Yathrib bertujuan untuk mengajar dan menerangkan mengenai Islam kepada penduduk Yathrib.

Pada tahun ke-13 kenabian, Mus’ab bin Umair kembali ke Mekah dengan membawa 70 orang lelaki dan 2 orang perempuan untuk memeterai perjanjian ‘Aqabah yang kedua dengan isi kandungan perjanjian yang lebih terperinci berserta bai’ah kepada Baginda S.A.W. bagi membina komuniti muslim yang kukuh di Yathrib.

Sepanjang perancangan baginda Nabi S.A.W. untuk melakukan hijrah, terdapat beberapa halangan dan cabaran yang semestinya ditempuhi oleh baginda dan umat Islam. Antaranya ialah rancangan puak Kafir Quraisy di Darul Nadwah yang ingin membunuh Nabi S.A.W. sebelum Nabi sempat untuk berhijrah ke Madinah. Namun atas keyakinan dan tawakal Nabi S.A.W. kepada Allah S.W.T., maka Nabi S.A.W. telah diselamatkan daripada perancangan jahat penduduk Musyrikin Mekah dan tanggal 27 Safar tahun ke-14 kenabian berlakulah peristiwa bersejarah ini iaitu penghijrahan Nabi S.A.W. ke Kota Madinah.

Setelah mengharungi 15 hari perjalanan, akhirnya pada 12 Rabiulawal tahun ke-14 kenabian, Rasulullah S.A.W. telah sampai ke Yathrib dan Nabi S.A.W. menamai semula kota tersebut dengan nama Madinah Al-Munawwarah. Ketibaan Nabi S.A.W. disambut dengan begitu meriah dan gembira oleh golongan Ansar di Madinah.

Setibanya Nabi di Madinah Al-Munawwarah, dua perkara yang sangat signifikan telah dilakukan oleh Baginda Rasulullah S.A.W. Pertama, mempersaudarkan kaum Ansar dan Muhajirin, manakala yang kedua ialah membina institusi masjid yang mana bukan sahaja menjadi tempat ibadah malah menjadi pusat komuniti umat Islam di Madinah pada waktu itu.

Peristiwa Hijrah ini memberi kita beberapa ibrah yang penting untuk kita nilai dan hayati bersama. Antaranya ialah kepentingan membuat perancangan strategik yang baik untuk menjamin kejayaan sesuatu perkara dalam jangka masa yang panjang dan berterusan. Perancangan hijrah Nabi S.A.W. ini telah membolehkan Islam berkembang dengan pesat di bumi Madinah sekaligus menjadi titik tolak kepada kebangkitan Islam sebagai salah satu empayar yang disegani dalam sejarah kemanusiaan. Selain itu, Hijrah mengajar kita agar meletakkan keyakinan dan tawakal hanya kepada Allah S.W.T. seperti yang ditunjukkan oleh para sahabat yang rela meninggalkan segala harta benda di Mekah semata-mata untuk berhijrah ke Madinah dan hanya berbekalkan sifat tawakal dan keyakinan kepada Allah S.W.T.

Kesimpulannya, Peristiwa Hijrah Nabi Muhammad S.A.W. ini merupakan salah satu peristiwa terpenting dalam sejarah perkembangan umat Islam dan sarat dengan pelbagai iktibar dan pengajaran yang boleh kita ambil sebagai panduan dalam mengharungi kehidupan sehari-hari untuk menjadi umat Islam yang berjaya di dunia dan akhirat.



FADHILAT DAN KELEBIHAN IBADAH KORBAN DALAM ISLAM

Oleh : Ustaz Abdul Rahman Iqbal bin Aldi

Ibadah korban merupakan salah satu ibadah sunat yang dituntut untuk dilaksanakan oleh umat Islam untuk memperingati peristiwa agung Nabi Ibrahim A.S yang menyembelih anaknya Nabi Ismail A.S. Disebalik perintah pensyiaran ibadah korban ini pastinya terkandung banyak kelebihan dan fadilat yang besar khasnya kepada umat Islam.

MELATIH UMAT ISLAM UNTUK SANGGUP BERKORBAN HARTA DEMI KEPENTINGAN SAUDARA MUSLIM YANG LAIN

Ibadah korban bertujuan untuk melatih jiwa umat Islam untuk sentiasa bersedia dan sanggup mengorbankan sebahagian dari harta mereka demi membantu saudara muslim yang lain, terutamanya yang kurang berkemampuan. Malah syarat pembahagian daging korban juga ditetapkan sebahagiannya untuk diberikan kepada saudara semuslim yang fakir dan miskin bagi meringankan kesusahan mereka.

MELATIH SIFAT REDHA DAN SABAR DALAM DIRI UMAT ISLAM

Peristiwa korban yang dilakukan oleh Nabi Ibrahim A.S dan Nabi Ismail A.S mengajar umat Islam akan ketinggian sifat redha dan sabar para nabi yang harus dicontohi dalam kehidupan sehari-hari. Orang Islam yang beriman yang mempunyai sifat redha dan sabar yang tinggi adalah golongan yang sangat dipuji oleh Rasulullah S.A.W. seperti sabda baginda:

“Sungguh ajaib perihal orang mukmin, sesungguhnya semua urusan mereka adalah kebaikan. Dan keadaan ini tidak ada melainkan kepada orang yang beriman sahaja. Sekiranya beroleh kurniaan dia akan bersyukur, maka jadilah kurniaan itu baik untuknya. Manakala apabila ditimpa musibah, dia bersabar. Maka jadilah musibah itu kebaikan untuknya.” (Hadis Riwayat Imam Muslim)

MELATIH ORANG BERIMAN AGAR SEDIA UNTUK MELEPASKAN HARTA DUNIA DEMI MENCAPAI AKHIRAT

Sifat orang yang beriman itu ialah tidak menjadikan dunia sebagai suatu yang dikehjera dalam hidup bahkan ianya hanyalah jambatan untuk menuju kepada akhirat yang kekal abadi. Oleh yang demikian, orang yang beriman pastilah sentiasa bersedia untuk mengorbankan harta dijalanan Allah S.W.T. untuk mencapai kebahagian dan keutamaan yang telah tersedia di akhirat nanti. Orang yang beriman juga tidak menjadikan dunia sebagai penghalang bagi mereka mengingati dan mentaati Allah S.W.T. Firman Allah S.W.T.:

“Wahai orang-orang yang beriman! Janganlah kamu dilalaikan oleh (urusana) harta benda kamu dan anak-pinak kamu daripada mengingati Allah S.W.T. (dengan menjalankan perintahNya). Dan (ingatlah), sesiapa yang melakukan demikian, maka mereka itulah orang-orang yang rugi. (Surah Al-Munafiqun: 9)

MENYEMAI SIFAT IKHLAS DALAM MELAKUKAN IBADAT KEPADA ALLAH S.W.T.


Ibadah korban juga melatih umat Islam supaya sentiasa bersifat ikhlas dalam menjalankan ibadah kepada Allah S.W.T. Antara perkara sunat dalam melakukan ibadah korban ini ialah menyembelih haiwan ternakan yang terbaik dan sempurna. Selain itu, mengorbankan harta yang paling disayangi untuk jalan Allah S.W.T. adalah salah satu tarbiyah dan latihan bagi mencapai keikhlasan dalam beribadah kepada Allah S.W.T.

Kesimpulannya, ibadah korban ini tidak hanya menuntut kita untuk mengingati dan mengenang kembali peristiwa Nabi Ibrahim A.S, namun mengajar kita hikmah yang besar untuk dijadikan panduan dalam mencapai martabat mukmin yang benar-benar ikhlas dan mentaati perintah Allah S.W.T. Mudah-mudahan dengan ibadah korban yang dilaksanakan akan dapat menyemai sifat-sifat mahmudah dalam diri sekaligus menghakis tabiat dan sikap buruk kita selama ini.

SEJARAH AWAL MASJID BANDARAYA KUCHING

(Sambungan artikel daripada Buletin Mimbar Edisi 137 (Arim-Jun) 2017)

Salah satu daripada menara-menara yang terdapat pada rekaan bangunan masjid ialah dilengkapi dengan tangga yang dibina berpusing dan mempunyai 52 anak tangga. Di sebelah selatan pula terdapatnya anjung berbentuk bulat bagi memudahkan jemaah mengambil wudhu'. Anjung tersebut mempunyai 32 sumber air secara keseluruhannya. Di atas anjung tersebut pula dibina satu bulatan pancutan air yang dilengkapi dengan api yang berwarna-warni. Berdekatan dengan anjung itu pula terdapat sebuah bilik khas bagi menempatkan jenazah sebelum dikebumikan. Manakala, di bawahnya pula, kira-kira sedalam 18 kaki turut dibina tandas untuk kemudahan para jemaah.



Pelan lama aras bawah Masjid Bandaraya Kuching sebelum di ubah suai pada tahun 2010

Ruangan di tingkat bawah masjid adalah seluas 120 kaki lebar dan 110 kaki panjang. Di sebelah selatan pula menempatkan empat buah bilik tamu, bilik pegawai masjid, bilik pentadbiran dan juga Kutub Khanah. Lantai di sekeliling tepi masjid pula diperbuat daripada Terrazzo buatan Italy berwarna putih berbintik hitam serta diwarnakan dengan warna hitam berbintik putih. Di tengah-tengah dewan, hamparan permaidani seluas 72' x 84' berwarna kelabu, hijau dan coklat berbintik-bintik turut diletakkan.



Pada dinding dan tiang-tiang masjid pula dialas dengan jubin-jubin berwarna coklat berbintik biru dan kesumba. Di sebelah kiblat pula, Mihrabnya yang berupa kubung serta dihiasi dengan jubin kaca berwarna biru muda dan perak telah diukir dengan ayat-ayat suci Al-Quran. Bersebelahan dengannya pula terletaknya Mimbar. Pada bumbung dewan dilengkapi dengan sebuah Chandelier yang mempunyai enam tangkai lampu. Di tengah-tengahnya lengkap dihiasi dengan sebuah Chandelier besar dan bercabang serta mempunyai 16 buah lampu kecil berserta satu di tengah-tengah.

RANCANG KEWANGAN UNTUK ELAK MUFLIS

Ramai diantara kita menghadapi masalah kewangan disebabkan kegagalan merancang sumber kewangan. Menurut Datuk Paul Selva Raj, Ketua Pegawai Eksekutif Gabungan Persatuan Pengguna Malaysia (FOMCA), dilaporkan seramai 41 orang belia Malaysia berumur lingkungan 21 hingga 40 tahun dianggarkan menjadi muflis setiap hari akibat kurangnya pengetahuan berkaitan pengurusan kewangan (Utusan Malaysia, 2011). Belia dikatakan golongan utama menghadapi masalah kewangan dan menjadi muflis berbanding orang dewasa akibat daripada perbelanjaan yang tidak terkawal.

ANTARA PUNCA UTAMA BERLAKUNYA MASALAH MUFLIS DALAM KALANGAN BELIA ADALAH DISEBABKAN:

- Urusan sewa beli seperti kereta, rumah dan penggunaan kad kredit. Seseorang itu dikira mempunyai masalah kewangan apabila 30 peratus daripada gaji bulanan digunakan untuk membayar hutang
- Menggunakan wang simpanan untuk membayar bil semasa
- Membayar jumlah minimum apabila menyelesaikan hutang kad kredit
- Selalu meminjam wang untuk menampung perbelanjaan harian
- Hanya membayar jumlah minimum apabila menyelesaikan hutang dan tidak mengurangkan jumlah hutang yang sedia ada
- Sentiasa bertengkar dengan suami/isteri atau keluarga berkaitan wang

Masalah ini dapat dielakkan jika mereka mempunyai pengetahuan mengenai cara pengurusan kewangan yang betul seperti:

1. Menetapkan matlamat kewangan

Menetapkan matlamat kewangan akan memastikan perbelanjaan seseorang serta penyimpanan berlaku secara teratur. Matlamat ini boleh berbentuk jangka masa pendek, sederhana atau panjang bergantung kepada faktor-faktor seperti usia, pendapatan, taraf perkahwinan dan jumlah tanggungan.

2. Jejaki pengaliran wang

Kurangkan perbelanjaan yang berkaitan dengan kehendak serta kenalpasti dan elak tabiat buruk ketika berbelanja. Seseorang itu perlu merekod segala perbelanjaan dalam tempoh tertentu. Ini bertujuan untuk mengetahui ke mana wang telah dibelanjakan bukan untuk mengurangkan perbelanjaan. Seperti contoh, bila perbelanjaan perlu direkodkan dan disimpan bagi semakan perbelanjaan. Oleh yang demikian, tabiat berbelanja perlu dinilai sekiranya tidak mempunyai sebarang lebihan wang pada akhir bulan atau ingin meningkatkan jumlah simpanan.

3. Menulis perancangan perbelanjaan

Setelah mengkaji tabiat berbelanja, pelan perbelanjaan boleh dibuat untuk membantu mencapai matlamat kewangan. Terdapat banyak buku-buku mengenai pengurusan kewangan yang terdapat di kedai-kedai buku yang boleh digunakan untuk membantu pengguna membuat dan memantau perbelanjaan harian, bulanan dan tahunan.

Rujukan:

Utusan Malaysia. (2011). 41 Belia muflis setiap hari gagal urus kewangan. Diambil daripada http://www.utusan.com.my/utusan/info.asp?y=2011&dt=1012&pub=Utusan_Malays ia&sec=Muka_Hadapan&pg=mh_03.htm

SURANITA BINTI AJIMI

PEMBANTU TABDIR

Tarikh Lahir : 16 Oktober 1974

Umur : 43 tahun

Asal : Kuching Sarawak


Tarikh Mula Berkhidmat : 1 April 1994

"Setiap kesabaran yang ditempuh, pasti akan menemui kejayaan". Itulah kata-kata yang menjadi kunci kejayaan individu yang terpilih untuk memenuhi ruangan edisi Buletin Mimbar pada kali ini.

Puan Suranita binti Ajimi merupakan kakitangan yang tidak asing lagi di Bahagian Pentadbiran, Sektor Pentadbiran dan Pengurusan, Lembaga Amanah Kebajikan Masjid Negeri Sarawak (LAKMNS).

Berasal dari Kuching, Sarawak, Puan Suranita dilahirkan pada tanggal 16 Oktober 1974. Anak keempat daripada lapan orang adik beradik ini telah berkhidmat di LAKMNS selama 23 tahun iaitu memulakan kerjayanya pada 1 April 1994 sebagai pembantu tadbir.

Memiliki berperwatakan ceria dan bersahaja, Puan Suranita merupakan seorang ibu tunggal dan dikurniakan seorang putera yang telah menjadi sumber kekuatan beliau selama ini iaitu Muhammad Zhayrul Izat bin Zuber.



Memilih warna ungu sebagai warna kegemaran, Puan Suranita gemar menghabiskan masa lapangnya bersama-sama puteranya dengan melakukan aktiviti seperti memancing dan bermain boling.

Antara pengalaman manis yang tidak dapat dilupakan oleh beliau semasa berkhidmat di LAKMNS ialah Puan Suranita telah dihantar untuk mengikuti Kursus Askar Wataniah bersama-sama rakan-rakan LAKMNS pada tahun 1994.

Harapan Puan Suranita agar LAKMNS sentiasa maju dan beroleh kejayaan pada masa akan datang. Ini kerana, untuk berjaya dan hebat, tanamlah sifat sabar dalam diri seseorang itu. Sesungguhnya, sabar itu sebahagian daripada iman.



Puan Suranita serta kakitangan di Sektor Pentadbiran dan Pengurusan, LAKMNS mengabdiakan kenangan ketika Majlis Sambutan Ramah Tamah Aidilfitri.

RASYIDAH BINTI SAUJI

GURU MATTARY

Tarikh Lahir : 28 Julai 1990

Umur : 27 tahun

Asal : Santubong, Kuching

Tarikh Mula Berkhidmat : 11 Mac 2015

Cikgu Rasyidah binti Sauji dilahirkan pada 28 Julai 1990 di Hospital Umum Kuching, Sarawak. Anak kelahiran Santubong ini merupakan anak ke-3 daripada lima orang adik-beradik. Cikgu Rasyidah seorang yang berperwatakan ceria, peramah, senang didampingi, prihatin serta penyayang terhadap anak-anak murid Ma'had Tahfiz Tun Abdul-Rahman Ya'kub (MATTARY) bahkan dengan rakan sekerjanya.

Beliau telah mendapat pendidikan menengah rendah di SMK Sri Aman kemudian menyambung pelajaran menengah atas di SMK(A) Sheikh Haji Othman Abdul Wahab (SHOAW) hingga tamat Tingkatan Lima. Kemudian, Cikgu Rasyidah melanjutkan pelajaran ke Universiti Islam Antarabangsa Malaysia (UIAM) kampus Gombak dan mendapat Ijazah Sarjana Muda Ilmu Wahyu dan Kesenian Islam.

Cikgu Rasyidah telah memulakan tugas sebagai Guru Pelatih di MATTARY pada 11 Mac 2015. Kemudian, diserap ke jawatan tetap sebagai Guru Akademik MATTARY pada 11 April 2016. Di MATTARY, beliau bertanggungjawab sebagai guru kelas Tahun 2 Al-Farabi, Ketua Panitia Dunia Seni Visual di samping mengajar mata pelajaran Bahasa Inggeris, Pendidikan Islam dan Pendidikan Jasmani dan Kesihatan.



Cikgu Rasyidah bersama Muhd. Zahiid Aiman murid Tahun 6 Al-Biruni sesi 2016 semasa Minggu Bahasa MATTARY.



Sempat berswafoto bersama murid-murid tahun 6 semasa program motivasi pelajar.

Cikgu Rasyidah gemar menghabiskan masa lapang dengan membaca buku, dan melancong bersama teman-temannya. Beliau juga aktif dalam bidang kurikulum serta pernah beberapa kali bertugas sebagai jurugambar untuk program yang dianjurkan oleh pihak sekolah.

Oleh itu, besarlah harapan beliau agar MATTARY bakal menjadi institusi tahfiz yang ulung di Sarawak dalam usaha melahirkan golongan huffaz yang profesional dalam pelbagai bidang serta disegani oleh masyarakat.



Cikgu Rasyidah bersama Ustazah Abidah dan anak-anak MATTARY semasa Sambutan hari kemerdekaan 2016

DZULKIFFLIE BIN AL-EE

GURU MATTARY

Tarikh Lahir : 18 Februari 1987

Umur : 30 tahun

Asal : Asajaya, Kota Samarahan

Tarikh Mula Berkhidmat : 11 Mei 2014

Cikgu Mohamad Dzulkiffie bin Al-ee atau lebih mesra dipanggil Cikgu Dzul, dalam kalangan anak-anak Ma'had Tahfiz Tun Abdul-Rahman Ya'kub (MATTARY) dilahirkan pada 18 Februari 1987.

Anak kelahiran Asajaya, Kota Samarahan ini merupakan anak ke-5 daripada lapan orang adik beradik. Beliau merupakan seorang yang berdikari kerana sejak usia 13 tahun beliau telah tinggal di sekolah berasrama penuh iaitu di SMKA (A) Sheikh Haji Othman Abdul Wahab (SHOAW) hingga tamat Tingkatan Enam. Kemudian, beliau melanjutkan pelajaran di Universiti Malaysia Sabah (UMS) dan mendapat Ijazah Sarjana Muda Psikologi – Pembangunan Belia Dan Komuniti.

Beliau juga pernah berkhidmat sebagai Pegawai Latihan di Majlis Daerah Samarahan (2010 hingga 2011), Pegawai Pelatih di Jabatan Khidmat Negara (2011 hingga 2012), serta Pensyarah di Kolej Sains Dan Pengurusan Sarawel, Kuching (2012 hingga 2015). Beliau juga sering terlibat dengan aktiviti luar sebagai motivator dan fasilitator untuk sekolah rendah dan sekolah menengah.



Bergambar bersama rakan-rakan sekerja.

Berbekalkan pengalaman yang ada, pada tanggal 11 Mei 2015, Cikgu Dzul telah diterima berkhidmat di MATTARY sebagai Guru Pelatih. Kini, beliau telah diserap ke jawatan tetap sebagai Guru Akademik MATTARY.

Di MATTARY, Cikgu Dzul merupakan Ketua Panitia Pendidikan Jasmani dan Kesihatan. Disamping mengajar subjek Pendidikan Jasmani dan Kesihatan, beliau turut mengajar subjek Reka Bentuk dan Teknologi Maklumat, subjek Sejarah dan subjek Sains.

Selain itu, Cikgu Dzul turut aktif dalam program sekolah terutamanya dalam kurikulum seperti pelaksanaan Sukan Tahunan Sekolah dan sebagainya. Beliau juga pernah beberapa kali mewakili MATTARY untuk Pertandingan Boling anjuran BKRK, LAKMNS.

Justeru, besarlah harapan beliau ke atas anak-anak MATTARY agar suatu hari nanti anak-anak MATTARY menjadi insan yang cemerlang dan terbilang dari aspek sahsiah dan rohani serta menjadi contoh teladan untuk masyarakat dunia.



Cikgu Mohamad Dzulkiffie, bersama rakan sekerja semasa Program Solat Hajat di Masjid Jamek, Kuching.

PUTERI INTAN ZULAIQA BINTI YUSUF

PELAJAR MATTARY

Tarikh Lahir : 3 Ogos 2005

Umur : 12 tahun

Asal : Kuching, Sarawak

Tahun : 6 Al Farabi

Hobi : Badminton, melayari Internet dan membaca

Cita-cita : Menjadi guru hafizah

Puteri Intan Zulaiqa merupakan murid Tahun 6 Al-Farabi, Ma'had Tahfiz Tun Abdul-Rahman Ya'kub (MATTARY). Dilahirkan pada 3 Ogos 2005, adik Puteri Intan Zulaiqa atau lebih mesra dipanggil Intan dalam kalangan rakan-rakannya merupakan anak kelima daripada enam orang adik beradik.

'Kecil-kecil cili padi' itulah peribahasa yang sesuai dikaitkan dengan Puteri Intan Zulaiqa. Walaupun pendiam, adik Intan seorang yang pintar dan rajin orangnya. Bersemangat untuk bersaing secara sihat dalam pembelajaran disusuli dorongan para guru, keluarga serta rakan-rakan membuatkan adik Intan menaruh cita-cita untuk menjadi seorang guru yang hafizah.

Adik Intan merupakan anakanda kepada Puan Rockiah binti Marzidi yang juga merupakan pekerja sokongan di MATTARY. Di rumah, adik Intan gemar membantu ibunya melaksanakan kerja-kerja rumah seperti mengemas rumah. Adik Intan juga sering melakukan aktiviti bersama adik beradiknya seperti membuat buku skrap dan aktiviti riadah di luar rumah.



Puteri Intan Zulaiqa bersama keluarga ketika Hari Raya Aidilfitri yang lalu.



Puteri Intan Zulaiqa bersama ibunya iaitu Puan Rockiah binti Marzidi ketika bercuti di Kuala Lumpur.

Tom Yam, Laksa Sarawak dan jus buah-buahan merupakan makanan serta minuman kegemarannya. Pada masa lapang, Adik Intan gemar melakukan aktiviti seperti bermain badminton, membaca buku serta melayari internet.

Adik Intan bersama-sama rakan karibnya iaitu Aida Syifa, Azuria Shafeeqa dan Khadijah Nur Hanani sering mengulang kaji pelajaran bersama-sama ketika berada di sekolah.

Subjek yang diminati oleh adik Intan ialah Bahasa Malaysia. Adik Intan sering mendapat keputusan yang cemerlang dalam subjek Bahasa Malaysia penulisan. Dalam bidang hafazan pula, Adik Intan telah menghafal sehingga juzuk 28, Surah At-Thalaq di bawah bimbingan Ustazah Fatimahtuzzahrah.



Puteri Intan Zulaiqa bersama Cikgu Rahimah dan rakan-rakannya ketika di sekolah.

NAJWAN AKRAM BIN ABDUL RANI

PELAJAR TATTARY

Tarikh Lahir : 8 Februari 2011

Umur : 6 tahun

Asal : Kuching, Sarawak

Hobi : Mengumpul koleksi gambar haiwan prasejarah



Adik Najwan Akram bin Abdul Rani merupakan anak bongsu daripada empat orang adik beradik dilahirkan di Pusat Pakar Perubatan Normah, Kuching Sarawak pada 8hb Februari 2011.

Adik Najwan Akram kini belajar di kelas 6 Arif, Tadika Tahfiz Tun Abdul-Rahman Ya'kub (TATTARY) di bawah bimbingan Cikgu Rahmah, Cikgu Salida dan Cikgu Zuliana. Mesra dengan panggilan Akram di kalangan guru dan rakan sekelas, adik Akram mempunyai pewatakan yang periang, ringan tulang dan suka bertanya.

Sama seperti kanak-kanak yang lain, adik Akram juga gemar menonton televisyen dan siri animasi watak Boboiboy adalah rancangan yang sangat digemarinya. Selain itu, adik Akram juga suka mengumpul koleksi haiwan prasejarah seperti dinosaurus sebagai hobi.

Makanan kegemarannya adalah roti susu dan ayam goreng. Manakala minuman kegemarannya pula adalah milo ais.

Adik Akram menanam hasrat untuk menyambung pelajarannya di Ma'had Tahfiz Tun Abdul-Rahman Ya'kub (MATTARY) dan menurut ibunya dia menyimpan cita-cita untuk belajar di Madinah Al-Munawwarah. In Sha Allah.





**BORANG PENYERTAAN KELAS AL-QURAN DEWASA
ANJURAN PUSAT PENGAJIAN AL-QURAN TUN ABDUL-RAHMAN YA'KUB (PATARY)**

PERHATIAN:

- I. Silakan boleh dengan tulisan yang telak dan benar-benar semata-mata.
- II. Sila setiaikan 1 salinan kad pengenalan.
- III. Yuhan Penyertaan dikurangkan RM 50.00 setiap bulan.
- IV. Bayaran yuran hendaklah dibuatkan pada sesetengah awal bulan

MAKLUMAT DIRI

NAMA	:
JANTINA	:
NO. KAD PENCENALAN	:
TARIKH LAHIR	:
ALAMAT	:
NO. TELEFON	:
TARAF PENDIDIKAN	:
ALAMAT MAJIKAN	:
PEKERJAAN	:

SILA TANDA '✓' PADA YANG BERKENAAN

KELAS ASAS	:
KELAS PERTENGAHAN (TA'AWUD)	:
KELAS MAHIR (TARAF NUM)	:

PERAKUAN PEMOHON

Saya mengaku bawa semua keterangan di atas adalah benar dan akan mematuhi syarat-syarat yang ditetapkan oleh pihak pengajur.

Tarikh : _____ Tandatangan : _____

UNTUK PERTANYAAN SILA HUBUNGKU :
NO. TEL : 082-443232 / 082-449813 (PUAN HARVATI BINTI MOHAMAD / PUAN NOORMAH BINTI TAIB)
NO. FAX : 082-449815

* Pendaftaran tarikh Kelas Al-Quran merupakan keperluan Tenaga Pengajar.



**KURSUS
*Dre Dikuhinian***

RM100.00 SEORANG

BORANG PENYERTAAN

* Sila lengkapkan ruang kosong dibawah. Borang yang tidak lengkap akan dicadangkan.

NAMA:	:
NO. KAD PENCENALAN:	:
TARIKH LAHIR:	:
ALAMAT:	:
NO. TELEFON:	:
TARAF PENDIDIKAN:	:
ALAMAT MAJIKAN:	:
PEKERJAAN:	:

UNTUK KEGUNAAN PEJABAT	:
NO. REST:	:
TARIKH TERIMA:	:
TARIKH/COP TERIMA:	:

ANJURAN: LEMBAGA AMANAH KEBAJIKAN MASJID NEGERI SARAWAK
DILAKUKAN OLEH: JABATAN AGAMA ISLAM SARAWAK (JAYS)

UNTUK KETERANGAN LANJUT SILA HUBUNGKU:
NO. TELEFON: 082-443 232, 082-449 813 (Puan Harvati Binti Mohamed / Puan Fairidah Binti Ahmad)

NO. FAX: 082-449 815 | EMEIL: patary.lakmns@gmail.com

Tandatangan: _____ Tarikh: _____

Saya mengaku bawa semua keterangan di atas adalah benar dan akan mematuhi syarat-syarat yang ditetapkan oleh pihak pengajur.

TARikh TUTUP PENDAFTARAN: 7 hari bekerja [seminggu] sebelum tarikh kursus bermula.

PERAKUAN PEMOHON

Saya mengaku bawa semua keterangan di atas adalah benar dan akan mematuhi syarat-syarat yang ditetapkan oleh pihak pengajur.

Tandatangan: _____ Tarikh: _____